

IN LINIE IL GNÛF SÎT DE ARLeF: CUN PÔCS “CLICK” AL MET A DISPOSIZION STRUMENTS TECNOLOGJICS E CONTIGNÛTS SPECIÂI PAI FRUTS

Une **navigazion facile e intuitive che e optimize la reperibilitât di informazions e di struments tecnologjics**, une identitât grafiche trative e siore di imagjins, **contignûts speciâi pai fruts**. La ARLeF - Agjenzie Regionâl pe Lenghe Furlane e à presentât in maniere uficiâl il gnûf sît istituzionâl dilunc di une conference stampe là che a son intervignûts l'assessôr aes Autonomiis locâls, Pierpaolo Roberti, il President de Agjenzie Eros Cisilino e Fulvio Romanin, aministradôr delegât di Ensoul srl, la *web agency* udinese che lu à fat.

Dal dut “lizêr” inte strutture grafiche e in version **trilengâl** (furlan, talian e inglês), il gnûf sît al è programât **daûr de tecnologjie “responsive”**, par facilitâ la navigazion di ogni gjenar di dispositîf. Dutis lis sôs componentis di fat a vegnin ridimensionadis e redistribuidis par jessi dopradis cun ogni gjenar di supuart e, in particolâr, cui *smartphone*. L'acès ai diviers argomenti al è garantît de opzion di ricercje interne che e je une vore svelte.

Cetant impuartante e je la aree **“Struments linguistics”** che: e permet di consultâ in linie il Grant Dizionari Bilengâl talian-furlan (plui di 70.000 lemis inte part dal talian, riferîts a 68.000 lemis furlans), e da un acès svelt al Coretôr Ortografic Furlan e al Wordpress par furlan e e mostre, ancje midiant di un *videotutorial*, l'ûs de Tastiere furlane semplice. La sezion Multimedia e je siore di videos e di audios, libris e audiolibris par fruts, invezit la sezion materiâi e propon une grande sielte di tescj pe scuele, pe infanzie e pe sociolinguistiche. La aree “Projets” e conte invezit la grande e intense ativitât fate de Agjenzie intal setôr linguistic e culturâl. Ogni progjet al è presentât cuntune descrizion detaiade de ativitât e cuntune galarie fotografiche siore.

Vierzint l'incuintri, **l'assessôr Roberti** al à volût marcâ la grande impuartance dal sît: *“Al è un strument che al fâs in maniere che la Agjenzie e sedi pardabon trasparente, parcè che cu la navigazion si pues cognossi, intai detais plui particolârs, ce che si è daûr a fâ e ce che si à fat. Un strument inzornât in maniere costante e che al è in continue evoluzion, che al ufris tantis informazions utilis e che **si met al servizi de aministrazion publiche**, midiant de clarece in cont dai servizis di toponomastiche, di consulence linguistiche e dai servizis di traduzion che la Agjenzie e ufris”*.

*“Risultât di un grant lavôr di analisi, di progettazion e di disvilup dal software, il gnûf sît al rapresente un miorament in plui, sedi inte capacitât comunicative sedi inte strutture che e je funzionâl e acessibile cun facilitât – al sclaris il president **Eros Cisilino** -. Al ufris une vision largje de ativitât de ARLeF e ancje des carateristichis de lenghe furlane. O stimi che al sedi fundamentâl vê struments simpri plui valits par **promovi lis nestrîs ativitâts, soredut tra i zovins, e par ufrî in concret un servizi ai citadins**, tant che par esempi la pussibilitât di consultâ in timp reâl il Grant Dizionari”*.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
 Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<

A sierâ la conference stampe al è stât Fulvio Romanin, che al stime che il gnûf sît al è indenant a pet di tancj altris sîts istituzionai. *"Vignint di une tradizion di ecelence, il sît de ARLeF si rinove e cussì si adate ai timps e ai cambiaments dai siei utents: intun sît istituzionâl che al rapresente, di par se, un microcosmi culturâl e linguistic al è stât fat un **intervent impuartant di semplificazion e di studi des traietoriis di navigazion e di ricercje**, cuntune atenzion gnove ae navigazion mobile – al sclaris l'aministradôr delegât di Ensoul -. Tra lis sôs carateristichis plui particolârs e je chê di jessi fat - ancje intal backend gjestionâl - in lenghe furlane, doprant propit chel WordPress par furlan che doi agns indaûr al jere stât voltât de ARLeF cu la consulence tecnologjiche di Ensoul".*

Udin, ai 11 di Març dal 2019

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<